

YANGI O'ZBEKISTON

Ijtimoiy-siyosiy gazeta

№ 145 (1206), 2024-yil 20-iyul, shanba



www.yuz.uz



yuz.uznews



yuz_official



yuz.uz_news



yuz



OLYI MARTABALI MEHMONLAR ISLOM DUNYOSINING TURIZM POYTAXTI QADIM XIVADA ME'MORIY OBIDALAR BILAN TANISHDILAR

O'zbekiston Respublikasi Prezidenti Shavkat Mirziyoyevning taklifiga binoan Qirg'iz Respublikasi Prezidenti Sadir Japarov 18-19-iyul kunlari davlat tashrifi bilan mamlakatimizda bo'ldi.



Toshkentda o'tgan oliy darajadagi muzokaralarda ikki do'st mamlakat xalqlari manfaatiga xizmat qiladigan ko'plab kelishuvlarga erishildi. Davlat rahbarlari keng qamrovli strategik sheriklik munosabatlarini yanada chuqurlashtirish va kengaytirish to'g'risida Qo'shma bayonotni imzoladilar. Umuman, tashrif davomida 16 ta hujjat imzolandi. Energetika, avtomobilsozlik va to'qimachilik sanoatida yirik qo'shma loyihalarga start berildi.

O'zbekiston va Qirg'iziston yetakchilarning samimiy muloqoti 19-iyul kuni Xorazmda davom etdi.

Davlatimiz rahbari Shavkat Mirziyoyev va Qirg'iziston Prezidenti Sadir Japarov ikki mamlakat birinchi xonimlari bilan birgalikda dastlab Xiva shahridagi Ichan qal'a majmuasi va Nurillaboy saroy majmuasiga tashrif buyurdi.

Xiva shahri 1990 yilda UNESCOning Jahon merosi ro'yxatiga kiritilgan, 1997-yilda uning 2500 yilligi nishonlangan. Shahar 2020-yilda Turkiy dunyoning madaniy poytaxti, 2024-yilda esa Islom dunyosining turizm poytaxti bo'ldi.

"Ochiq osmon ostidagi muzey" sifatida tanilgan Xiva yaxlit yodgorlik sifatida

Markaziy Osiyoda saqlanib qolgan yagona shahar hisoblanadi. Bu yerda 120 dan ortiq me'moriy obidalar joylashgan.

Oliy martabali mehmonlar tanishuvini "Ota darvoza"dan boshlab, noyob "Ko'hna ark" majmuasi, Sherg'ozixon madrasasi, Juma masjidi, "Toshhovli" majmuasi va boshqa obidalar bilan tanishdi.

Mehmonlar sharafiga o'zbek xalq qo'shiqlari yangrab, teatrlashtirilgan tomosha namoyish etildi.

Shundan so'ng Nurillaboy saroyiga tashrif buyurildi.

Saroy-bog' majmuasi XX asr boshlarida bunyod etilgan. Majmua madrasa, 100 dan ortiq xonalar, galereyalardan iborat. Saroy xonalari bezashda xivalik mohir ustalar bilan birga chet ellik rassom-dekoratorlar ham ishtirok etganlar, ular saroyning sharqona qiyofasiga Yevropaning modern uslubini singdirganlar.

Xiva tarixi va uning fan rivojiga qo'shgan hissasi, shuningdek, hududning boy madaniyati va san'ati haqidagi hikoyalar qirg'izistonlik mehmonlarda katta taassurot qoldirdi.

Prezident Shavkat Mirziyoyev va Prezident Sadir Japarov "Xiva gilamlari" kombinatida bo'ldi.

2020-yilda tashkil etilgan mazkur korxonada yiliga 4,2 million kvadrat metr gilam va gilam mahsulotlari ishlab chiqarilib, Xitoy, Rossiya, AQSH, Qozog'iston va MDHning boshqa mamlakatlariga eksport qilinmoqda.

Yevropaning yetakchi davlatlari texnologiyasi bilan jihozlangan zamonaviy kombinatda bugungi kunda 750 kishi mehnat qilmoqda.

Prezidentlar korxonaning ishlab chiqarish jarayoni va shourumini, shuningdek, kombinat hududida tashkil etilgan "Made in Uzbekistan" brendi ostidagi sanoat mahsulotlari ko'rgazmasini ko'zdan kechirdilar.

Tegishli vazirlik va idoralarga o'zaro tajriba almashish, kooperatsiya va savdoni rivojlantirish bo'yicha ko'rsatmalar berildi.

Tashrif tadbirlari yakunlangach, Prezident Shavkat Mirziyoyev rafiqasi bilan Urganch xalqaro aeroportida Prezident Sadir Japarov va rafiqasini kuzatib qo'ydi.

O'ZA

O'zbekiston Respublikasi Prezidenti Matbuot xizmati surati.

Xalqaro e'tirof

Salim bin Muhammad al-Malik:

"O'ZBEKISTON – BARAKALI ZAMIN, MA'NAVIYAT XAZINASI, ISLOM CIVILIZATSIYASINING BUYUK MEROSI SOHIBIDIR"

Islom dunyosi ta'lim, fan va madaniyat tashkiloti (ICESCO) Bosh direktori

Salim bin Muhammad al-Malik "Dunyo" axborot agentligiga intervyu berdi

ایسیسکو
ICESCO

— Bosh direktor janoblari, bilimlari, O'zbekistonga bir necha bor tashrif buyurgansiz. Bugungi suhbatimizni mamlakatimiz haqidagi fikrlaringiz bilan boshlasak. O'zbekistonda qanday tasavvur qilaysiz, uning tarixi, madaniyati, zamonaviy taraqqiyoti va xalqaro maydondagi o'rnini qanday baholaysiz?

— Bismillahir rohmahir rohiym. Men O'zbekistonga kelganimda har safar o'zim uchun yangidan yangi qirralarni kashf etaman. Boy tarix va betakror madaniy merosga ega ushbu o'lkadan zavq olaman. Binobarin, ushbu jihatlarda mamlakatning asosiy ramzlaridan biri — davlat bayrog'idagi yorqin ranglarda ham o'z aksini topgan.

O'zbekiston bayrog'ining ilhom baxsh etuvchi ranglarini ko'zdan kechirayotganimda, bu bayroq oddiy tug' emasligiga, u o'zida chuqur ma'nolarni

ifodalovchi muqaddas ramzligiga amin bo'ldim. Bayroq faxrli voqealarga boy davlat tarixiga tayanadigan ramziy ranglarni ifodalovchi risoladir. Bu zaminning yerlari unumdor va barokatlidir. Xalqi esa tinchlik va osoyishtalik ne'matini yuksak qadrlaydi.

O'zbekiston bayrog'idagi moviy rang mangu osmon va obihayot timsolini aks ettiradi. Bu rang, shuningdek, hayotning davomiylik, xalqning umid va intilishlarini o'zida ifodalagan.

Oq rang esa o'zbek xalqining tinchlik, adolat va taraqqiyotga intilishini tasdiqlaydi. Bayroqdagi yashil rang Payg'ambarimiz Muhammad (s.a.v.) haqidagi sahif hadislarida rivoyat qilingan samoviy — Sirdaryo va Amudaryoning unumdorligidan dalolatdir.

Davomi 2-beta

O'zbekiston Respublikasi Prezidentining

QARORI

SIYOSIY QATAG'ON QURBONI BO'LGAN YURTDOSHLARIMIZ HAYOTI VA FAOLIYATINI O'RGANISH, TARG'IB ETISH HAMDA ULARNING XOTIRASINI ABADIYLASHTIRISH BORASIDAGI ISHLARNI KENGAYTIRISH TO'G'RSIDA

Ma'lumki, 1937-1953-yillarda mustabid tuzum tomonidan 100 mingdan ziyod xalqimiz vakillari qatag'on siyosatining qurboni bo'lgan. Bu yurtdoshlarimizning 13 ming nafari otib tashlangan, minglab kishilar nohaq quloq qilingan, surgunlarga jo'natilgan. Ular orasida atoqli davlat va siyosat arboblari, ilm-fan namoyandalari, ijodkor ziyolilar, diniy ulamolalar, harbiy soha va sud-huquq tizimi xodimlari, ishchi-dehqonlar va ularning oila a'zolari bo'lgan.

Vatanimizning milliy istiqloli, xalqimiz

ozodligi uchun kurashib, shu yo'lda jonini fido etgan, siyosiy qatag'on qurbonlari bo'lgan ota-bobolarimizning hayoti va faoliyatini atroficha o'rganish va tadqiq etish, ularning nomlari va xotirasini abadiylashtirish bo'yicha keyingi yillarda yurtimizda keng ko'lamli ishlar amalga oshirilmog'da.

Jumladan, 2021-2024-yillar davomida O'zbekiston Respublikasi Oliy sudi tomonidan 1 ming 200 dan ziyod siyosiy qatag'on qurbonlarining nomlari oqlanganini alohida qayd etish lozim.

Hozirgi murakkab va tahlikali davrda mustaqilligimizni har tomonlama mustahkamlash, tariximizning noma'lum sahifalarini tiklash va ilmiy nuqtayi nazardan chuqur o'rganish, inson, uning huquq va erkinliklarini oliy qadriyat sifatida e'tirof etish, shu asosda yurtdoshlarimiz, ayniqsa, yosh avlodning Vatan taqdiri va kelajagiga daxldorlik tuyg'usini, fuqarolik pozitsiyasini kuchaytirish, ularni bugungi tinch, erkin va ozod hayotning qadriga yetish ruhida tarbiyalash maqsadida:

1. Siyosiy qatag'on qurboni bo'lgan yurtdoshlarimizning hayoti va faoliyatini o'rganish hamda ularning xotirasini abadiylashtirish ishlarini muvofiqlashtirish bo'yicha respublika komissiyasi (keyingi o'rinlarda — Respublika komissiyasi) 1-ilovaga muvofiq tarkibda tashkil etilsin.

2. Quyidagilar Respublika komissiyasining asosiy vazifalari etib belgilansin:

Davomi 2-beta

Inson qadri uchun

ADOLATGA ELTUVCHI YO'L

Odamzod hamisha adolatga intilib yashaydi. Adolat tantanasida mo'jiza qudratini ko'rgandek bo'ladi. Mo'jiza esa o'z-o'zicha sodir bo'lmaydi. Uning zamirida hamisha xalq dardu tashvishlarini yangillatishga bel bog'lagan insonlarni birlashtirgan yaxlit tizim, kuchli, aniq va qat'iy mexanizm ishlab turgan bo'ladi.



Shu ma'noda, davlatimiz rahbari asos solgan Xalq qabulxonalari instituti "Davlat idoralari xalqimizga xizmat qilishi kerak" g'oyasining samarali hayotiy mexanizmi, ijtimoiy adolati ta'minlash borasidagi o'zbek davlatchilik maktabining yangi taraqqiyot bosqichi bo'lmoqda deyish mumkin.

Prezidentimizning siyosiy irodasi bilan barcha tizim faoliyati xalqimizni hayotdan rozi qilishdek ezgu maqsadga yo'naltirilgan tufayli keyingi yetti yilda qariyb 10 millionga yaqin murojaatning 70 foizi qanoatlanirildi. Yillar dinamikasida murojaatlar hal qilinishi 11,5 foizdan 85,7 foizgacha yetkazildi.

Davomi 3-beta

